

N chestionèr per valutèr i media

I aboné a La Usc di Ladins pel portèr dant sia opinion sui mesi de informazion ladins. Anter chi che respon l'é a la leta 10 abonamenc debant per l 2011 e 50 Cd.

Chestionèr- L. Servije per la Promozion de la Mendranzes Linguistiches de la Provinzia autonoma de Trent, con a cef l dirigent Marco Viola, l'à endrezà n chestionèr per ge domanèr a la jent de la comunanzes de mendranza sia opinion sun i desvalives media che vegn sostegnui da la Provinzia enstessa. Na valutazion sun i efec e l'ejit de la scomenzadives de finanziament e sostegn metudes a jir da la Pat era stata perveduda tel pian plurienal de intervenc de politica linguistica aproà da la Conferenza de la Mendranzes.

Per chel che vèrda l ladin, l chestionèr vegn portà dant travers l sfoi La Usc di Ladins: tel numer de anché i aboné de la Usc, enciasé te Fascia e te la Provinzia de Trent, troa ite l chestionèr olache i podarà portèr dant opinions, valutazions

e consees sun La Usc enstessa e sun Gana, sun i programes ladins de Radio Studio Record e sun chi televisives de TML e Ercaboan.

L chestionèr va manà ite a la Provinzia autonoma de Trent – Servije per la Promozion de la Mendranzes Linguistiches, V. Gazzoletti 2 – 38122 Trent, ma l pel ence vegnir consegnà a man a una de chesta direzions: Istitut Cultural Ladin – Str. de la Pieif 7 – 38039 Vich; Comun General de Fascia – Str. di Pré de Gejia 2 – 38036 Poza; Union di Ladins de Fascia – Str. de la Pieif 10 – 38039 Vich; Comuns de Fascia.

Anter chi che respon e mana ite l chestionèr dant dai 21 de otober vegn tirà fora a la brusca 10 abonamenc a la Usc di Ladins per l'an 2011 e 50 Cd.

Ajache l chestionèr vegn portà dant en forma anonima, te la

soracuerta l'é ence na zédola de color vert, spartida te doi pèrts, con scrit sù sun duta does Vosc codesc personèl: una pèrt la é da meter ensema col chestionèr te la soracuerta che darede de retorn, l'autra cognede la tegnir sù desche rezepris: se vegn tirà fora a la brusca Vosc codesc, cognarede aer la zedola per aer derit al pest.

La lista di codejes che venc vegnarà scritta o dita fora su la Usc di Ladins e sui media locai.

Per de altra informazions se pel se oujer a la Redazion de La Usc di Ladins de Fascia, a Sèn Jan, tel. 0462.764545, email: lausc@ladinsdefascia.it

Se sà ben, l'augure é che duc mane ite sia respostes, per poder coi consees de la jent miorèr semper de più i servijes e durèr i scioldi publics a na vida miora che l'é possibol.